

## Ungbamvu ku nggo Bulu à charr ku Anu Filipiya ba Ure ku mémé

Bulu na akpukpama ba a bwú uki ku barr Abachi ku Filipiya ku nu uzirr umaku uha ku. Abiga ba nu uki ku barr ku Filipiya ku a shirr aseki anu Ipafroditu gri ku Bulu nu nggo à kri iharr nu Roma.

Bulu à hi inkindirr yi nggo i ri inyarr na a tsarr anu Filipiya ba ima yo. À charr nyarr ba ku aseki ka nggo a gri ku nggo, na gbye ba utu di a bu kri karrkarr ni iga yi. À da ku abiga ba di inyarr ijiji i di zhi nu Yesu Kristi yo ku na nkpama. Abachi à bu di inta i na ina i Bulu yi ni bu zha ihi Yesu Kristi kakami. Ùwà ti bre ungbamvu ku Filipiya ku ùwà nyarr nà ta si Bulu, ni yo itu zizo ni iga yi wre ku ùwà bu hi inyarr nu Kristi ku.

### **Are ka nggo a charr ka nu ungbamvu unggó ku, tuku ankla ka nggo a charr ka nggo**

Iha i Roma yi i si han Bulu ni inyarr hen 1:1-30

Igri itu nggi nà ta si Kristi 2:1-30

Igbye utu tuku itsarr abiga iso 3:1—4:1

Iso su i Abachi tuku aseki ka nggo Abachi à di nu abiga ba 4:2-23

### *Ichi i Bulu*

<sup>1</sup> Ingga, Bulu tuku Timoti, abi na ku Yesu Kristi undu,

Inta ngga i charr ki imba anishirr ba Abachi ba namri nu Filipiya, imba nggo i kpa ure ku Yesu Kristi ku. Ankpinkpye ba na abi zi undu ba, inta chi imba we.

<sup>2</sup> Inta i so barr Abachi nggo uwa yo à si Aki amunta wa, ni so barr Yesu Kristi nggo uwa yo su Atiko amunta wa, di a bu na wre ki imba na bu ni imba isisurr.

### *Inyarr ni ibarr i Bulu*

<sup>3</sup> Ttuttumi nggo ingga ti gru ni ri amarr amba, ingga di nyarr ku Abachi. <sup>4</sup> Ingga so barr Abachi ttuttumi ki imba. Ni di barr ma ni inyarr kakami na atu amba, <sup>5</sup> nggo imba zi ingga nu undu ku bre ku anishirr ba Ure ku wre ku, ni itu i Yesu Kristi bazhi na azhibarr a imemé wa nggo imba i kpa ure ukuma nga zizami. <sup>6</sup> Ingga hi i si jiji mu di a si Abachi nggo à ni imba amarr ka na wre ka, ni ta kuchi nu undu ukuma kakuma na azhibarr wa nggo Yesu Kristi à ta kanga zizo nggo.

<sup>7</sup> Ingga i kpanye ni imba ba kakami! A si ki ingga inkindirr i iwre kakami ingga bu di ri amarr amba namri, nà ta si nggo ingga i so na zizami. I si meme nu nggo imba i kri ngbangba ni ingga ku ni zi ingga nu undu ku nggo Abachi à bwu ki ingga anko a ina ku. Zizami nggo a yo ki ingga ache mi tuku nggo ingga so di bre ku anishirr ba Ure ku wre ku mi, ni kri nu into kiibre amu ni ko tsarr ba du ure ku Yesu Kristi ku u si ure ujiji. Ni ima mi, imba bu kri ngbangba ni ingga ku. <sup>8</sup> Ingga i kpanye ni imba kakami nà ta si nggo Yesu Kristi à kpanye ni imba ba. Abachi mi à hi kakami di ingga i da su ure ujiji.

<sup>9</sup> Uwanggo yo à si ibarr imungga yi di imba bu kuchi ni kpanye ni ikpa mri imemé yi nggo imba i di na. Ingga barr zizo di imba ta hi Abachi kakami na aseki ka nggo a si ka wre ka nggo Abachi à kpanye na ka. <sup>10</sup> Meme yo nggo, imba ta kri ngbangba ni hla aseki azizi ka nggo imba i ta di na ka ttuttumi. Ima yo i ta du imba i so sama ni ila ure kakuma na azhibarr wa nggo Yesu Kristi à taka kanga. <sup>11</sup> Ingga so barr di Yesu Kristi à bu ni imba ukyekye umaku, nggo u ta di imba zirr zizi, meme nggo anishirr a ta hi uzirr umba ku na kru isisu i Abachi na bu nyarr ku.

### *Inkindirri nggo i du Bulu à nyarr*

<sup>12</sup> Amuya, ingga zha di imba bu hi di aseki ndanda ka nggo a na ki ingga, a kayo a du anishirr shishemi a kpanye nu Ure ku wre ku. <sup>13</sup> I kri nu uki ku iharr ku i du abi gbye akaba uttu ba na abanu nggo a kri nabo, a hi di a harr ingga nu uki ku undu ku nggo ingga na ku Yesu Kristi. <sup>14</sup> Nggo ingga kri ni iharr, ima yo i du abiga shishemi a ko da ure ku Abachi ku kyekye mi sama ni isisu.

<sup>15</sup> Abanu nu umi ku abiga ba a ko da ure ku Kristi ku nu unfu tuku ivri isisurr ni itu i mungga, na zha di anishirr ba bu ga aba mu, na ttu iga ingga yi ttungo. Abanu a ko bre ure ku ni isisurr imbarri iyirr, na ko zha di aba ta na ki ingga inkindirri nggo i si izizi. <sup>16</sup> Abi na meme ba, a sa abangga ba nggo a kpanye ni ingga ku, na hi di a si ikpanye i Abachi nggi i du ba a harr ingga nu uki ku, wre ku anishirr ba bu hi di ure ku Kristi ku su ure ujji. <sup>17</sup> Uwa a ti si abanu ba nanko, a so di da ure ku Kristi ku ku atu ambarr mu, wre ba bu tto iha a ttu

ingga nu uki ku harr ku. <sup>18</sup> A si si ki ingga inkindirr ivri hen, ka a ti na meme zhi na amarr azizi ka andanda. Aba so da su ure ku Kristi ku yo. Ima yo i du ingga se ni inyarr. Ingga ta di nyarr ttutsumi, <sup>19</sup> nu nggo ingga i hi di iki iha yi nggo ingga so ki yi, Abachi à ta kpa ingga ttungo. I ta si meme yo ni ibarr imba yi ni itu mungga, Izhi i Yesu Kristi yi i ta zi ingga. <sup>20</sup> Amarr amungga ka ni iyo isisurr imungga yi a si di ingga i zirr na anko wa nggo a ta du ishisha ki Abachi ni ingga ku hen. Ingga i ta vu isisurr, ka ti si iso tsitsirr, ka i si ittu imungga, ingga i ta ni re kyekiye mi na ba nâ ta si nggo ingga i di re ba zhi ni imemé yi nga ziza, wre ba bu hi inkpinkpye i Yesu Kristi yi nu uzirr umungga ku. <sup>21</sup> Ni ingga ku, a ti si iso tsitsirr, ingga mi i so ku inkpinkpye i Kristi. Uwa a ta si ittu mi, i ta wre sha ki ingga iso tsitsirr yi mi. <sup>22</sup> Ingga i ti ta so bari, ingga i ta kuchi nu undu ku nggo Kristi à zu ki ingga na ku. Ingga i si hi uwatanggo ingga i ta ttu nu umi umbarr ku hen. A ko gbye ingga na anga ka aha mi. Ingga bu ba iso nggi ka ittu? <sup>23</sup> Ingga i si hi uwanggo nggo ingga i ta ba hen. Ingga kye, ingga i ta ba ittu, nu nggo i ta du ingga taka ku so ni Kristi ku nu unkplassu, ima mu wre sha ki ingga iso tsitsirr ni ingbingbru inggi yi. <sup>24</sup> A si inkindirr iwre kakami ki imba ingga bu so tsitsirr, nâ ta si nggo imba mi i ko zha ingga. <sup>25</sup> Nggo ingga i hi di imba ni ko zha ingga kakami, i ta wre ingga bu so. Ingga i hi di ingga ta so tsitsirr, ni ta kuchi nu undu umungga ku ni imba ba, ni du imba kuchi nu undu ku ni mè nyarr ni iyo isisurr imba yi. <sup>26</sup> Iso imungga yi ni imba ba zizo i ta du imba i kuchi ni ta nyarr ku Yesu Kristi nggo gri ingga kanga.

<sup>27</sup> Imba bi kuchi na anko iwre wa nâ ta si nggo anishirr abi kpa Ure ku wre ku ni itu i Yesu Kristi à di na. Imba bu na meme, ka ingga ti nga ni hi imba, ka ingga ti si nga hen. Ima yo i ta du ingga i hi di imba i so kuchi nu undu ku, ni ttu ashishi i anishirr yi mi ni imba ba. Ingga i ta hi di imba i nggurr atu bi ki unushirr uyirr ni so kuchi nu undu ku nggo Ure ku wre ku Kristi ku u tsarr. <sup>28</sup> Ni si kru isisu i abangga ba nggo a ttu ashishi ni imba ba hen. Imba ti na meme, ima yo i ta tsarr di Abachi na nkpama ta tsi ba ngî na ta kpa inta ttungo ku ikpanye imba yi. <sup>29</sup> Abachi nggo à bwu ki imba anko nggo imba i ta ga Kristi, ni bu ki iha ku Yesu. <sup>30</sup> Ziza nggo, imba mi ta zi ingga ku itsi yi nggo ingga i so tsi ku Ure ku wre ku nggo. A si itsi iyiyirr ima yo nggo imba i hi ingga i tsi ni ikuchi yi. Ingga mi so tsi narr Ure ku wre ku nâ ta si nggo imba i wo nggo.

## 2

### *Abiga ba bu gri atu ambarr wa ji nâ ta si Yesu Kristi*

<sup>1</sup> Bazhi nu nggo imba i kpa ure ku Yesu Kristi ku, ima yo i du imba i kri ngbangba ni izhi yi. Ikpanye ima yi i zhi ki imba ni isisurr. Imba nggurr atu bi ni Izhi Abachi yi. Imba bu di kpanye yi ni ikpa ni ki itito ni ikpambirr ku. <sup>2</sup> Aseki angga ka a ti si are ajiji, ingga i ko tsi ki imba ango, imba bu kpanye ni ikpa, ni gri ikpa nu umé ni du amarr amba ka bu si ayirr. Imba i ti na meme, ingga i ta nyarr ki imba kakami. <sup>3</sup> Imba si na nu ukpa hen, ni si si na amarr ka inggurr anke hen. Imba bu gri atu amba wa ji ku ikpambirr, ni kye anishirr we ssu na

ungo mri atu amba wa. <sup>4</sup> Si ri amarr ka inkindirr yi nggo iwre ku imba yo na akpambirr hen. Imba bu ri amarr ka banu meme.

<sup>5</sup> Imba bu na amarr amba kuma ki ayirr nā ta si a ka Yesu Kristi ka.

<sup>6</sup> Nggo a si nā ta si Abachi na anko ka we,  
na si gi itu ima ki narrnarr na Abachi ku hen.

<sup>7</sup> À ka inkpinkpye ima yi à du namri,  
na ba unto ku ugarr.

A ngri ma nā ta si unushirr nggo.

<sup>8</sup> Nggo à se nu ukpa ku unushirr, na gri itu ima yi ji, na kru isisu i Abachi, na kpanye na ttu.

Nggo anishirr a kpa ma nga nu unkunkurr  
nā ta si nggo a di ngu abi ila ure.

<sup>9</sup> Ni ima yo, Abachi à gi ma mri aseki ka we kuma  
nu unto unkpi,

na nu ma isa inkpi yi nggo i mri asa wa we.

<sup>10</sup> Inkpinkpye isa i Yesu yi, i ta du aseki ka namri  
nu unkplassu, na anishirr ba nggo so ni  
imimi, na abangga ba nggo so na achi ka  
imimi ka,  
a ta kuttu na agbuzzu na chi ma.

<sup>11</sup> Meme yo, anishirr ba namri a ta bwu angu na  
da di Yesu Kristi à si Atiko.

Ni ima yo, inkpinkpye ni inyarr ta si i Abachi  
nggo a si Ati wa.

*Uzirr ku abiga u gri ibwu ashishi nga ni ingbing-bru yi*

<sup>12</sup> Amuya mungga yi, nggo ingga i di so ni imba  
ba, imba i di shirr ki ingga atu. Zizami nggo ingga i  
sama ni imba ba, imba bu shirr atu mri imemē yi.  
Imba bu gri atu amba wa ji ni na undu ku Abachi  
ku ni isisu ni iwri kpakpa. Ima yo i ta tsarr di

Abachi à kpa imba ttungo. <sup>13</sup> Nggo imba i hi di a si Abachi nggo à so na undu ku wre ni isisurr imba yi. Nggo à ni imba isisurr ikpanye ni na undu ku nggo à zha di imba bu na ku. Uwa yo à ta zi imba du imba na aseki angga ka.

<sup>14</sup> Inkindirr yi nggo imba ta di na, imba bu na yi sama ni iri anta ni ngonarr. <sup>15</sup> Imba ti na meme, imba ta sama ni ila, undurr à si ta da di imba i kpa ilà hen. Imba ta si amumarr ba Abachi nggo sama ni ilà nu umi ku anishirr ba nggo a si abi ila ure kakami. Imba bu zirr ndindi nu umi umbarr ku, ni ila zzu intsintse yi nggo i di la nu unkplassu. <sup>16</sup> Imba bu bre ku anishirr ba Ure ku wre ku nggo u ta du ba a so sese nggo a ti hi Abachi. Imba ti na meme, ingga ta si ni inyarr ma ni inga i Yesu Kristi yi. Ingga si ta da di undu umungga ku u si ku gigye hen. <sup>17</sup> Iyo isisurr imba yo i du imba i ni atu amba ki ito ankpurri ni na ku Abachi undu. Ingga ta nyarr ni imba ba nggo ingga ti ta ni ayiyi mungga wa mi ni iyo isisurr imba yi. <sup>18</sup> Imba mi bu me nyarr ni ingga ku meme.

*Bulu da du uwa à ta tu Timoti tuku Ipafroditu  
kuma nu Filipiya*

<sup>19</sup> Ni ikpanye i Atiko Yesu yi, ingga ta tu Timoti ni imba ba ywhiywhirr mi. Nggo a ti kanga ni da ki ingga di imba i si kyekye, ingga i ta nyarr. <sup>20</sup> Ingga sama nu undurr numa ni ingga ku ni inggya nggo a so di ri amarr amba ka zzu nà ta si Timoti. A so di na meme yo, ka imba i ti so zizi ka imba i so ndanda. <sup>21</sup> Ingga i da meme nggo abanu amba ba a ki itu ni zha aseki ambarr mu, na si ri amarr ka inkindirr yi nggo Yesu Kristi à zha yi hen. <sup>22</sup> Imba

mi hi nggo Timoti à kri ngbangba ni yo isisurr ima yi, na na undu ku bre Ure ku wre ku ni ingga ku zuu nà ta si uvuvurr wa nggo à di na undu tuku aki ama. <sup>23</sup> Ingga i ko kye di ingga i ta tu ma ni imba ba, nggo ingga ti hi inkindirr yi nggo ta la ni ingga ku ni inggya nggo. <sup>24</sup> Ingga i hi di Abachi à ta kpanye na di ingga i nga ni hi imba.

<sup>25</sup> Ingga kye, i wre ingga bu tu uzumburr mutta wa Ipafroditu di a bu kanga ni imba ba. A di na undu ku ibre ku anishirr ba Ure ku wre ku ni ingga ku, na kri ngbangba na zi ingga itsi na abi karr Ure ku wre ku ba ba. Imba yo i tu ma di a bu ni zi ingga undu ku nggo imba ka nga namri, uwa nga ni zi ingga jiji. <sup>26</sup> Ziza nggo ingga i ko turr ma kakuma ni imba ba, nggo a so di ri amarr amba ttutsumi, na vri isisurr du uwa ka hi imba, nggo a hi di imba so ri amarr ni itu ima yi, bazhi nu nggo imba i wo ikurr ukpa ima yi. <sup>27</sup> Nggo a da ki imba da a kurr ukpa, a su jiji. A kurr ukpa kakami nggo a ki ywhiywhirr ittu. Abachi mu du ma à wre. Abachi si ki itito ima yi nu uwa mu ku na kpa ma hen, a ki itito ni ingga ku mi meme, nggo a hi ivri isisurr imungga yi na si kpanye di inkindirr numa bu gri ki ingga ivri isisurr zizo hen. <sup>28</sup> Ima yo i di ingga ta du ma nga ni imba ba hanhan mi, nggo imba ta ni hi ma ni nyarr, ni di isisurr mungga yi mi bu su. <sup>29</sup> Nggo imba i ti hi ma ni nyarr, imba bu kpa ma na ango aha, nà ta si uzumbirr amba ni isa i Yesu Kristi. Imba bu kye ma ssu na ango mri akpambirr abanu ba nggo a si ungo yirr na ku. <sup>30</sup> Imba bu kye ma ssu na ango nu nggo a ba itu ima yi a ni nu undu ku ga Kristi ku na a ki gaga ittu. A na meme

nu unto ku nggo imba ka se ni zi ingga, imba sama.

### 3

*Aseki ka ina wre nu ukpa si si inkindirr i iyo  
isisurr hen*

<sup>1</sup> Ziza yi, imba amuya, imba bu mē nyarr ku aseki ka nggo Atiko so di na. À si si ki ingga inkindirr i ivri hen, ingga bu charr ki imba zizo aseki angga ka nggo ingga ka bre ki imba na ka ba. A sa aseki akama yo ta zi imba, na di imba kri ngbangba ni inkindirr yi nggo si jiji.

<sup>2</sup> Imba bu si du ndanda anishirr angga ba, nggo si nā ta sa amiyo, a re imba hen. Kye ba sa agbugbu. A ko bre ku abiga ba nu ukorr kyekye di a bu ga ba ni iba i anu Yahuda yi, na ko re abiga ba na sarr ba iji gigyemi. <sup>3</sup> Inta yo sa anishirr ba Abachi a jiji ba. Inta yo so ga Abachi na anko wa nggo Izhi ima yi ko tsarr inta. Inta ko nyarr ki Yesu Kristi, ni so ga ma, ni si ta ko kye aseki ka nggo inta na hen, ni ko yo isisurr da Abachi ta ni yo inta ki anishirr a zizi. <sup>4</sup> À ka ti si inkindirr mi inggurr anke, na aseki ka nggo a da di aba so na ka, ingga ka mri ba inggurr anke yi. <sup>5</sup> Nggo ingga se ni ivi itandarr ni ingri, aba sarr ki ingga iji nā ta si nggo Abachi à da ku ábáchí amunta ba. Ingga su uvuvurr ingri Israila jiji, ni su uvuvurr nu uki ku Benyami. Ábáchí amungga ba sa anu Ibraniya, ingga mi sa ayiyi anu Ibraniya. Na are ka ábáchí munta ba, ingga sa anu Farrisi, nggo di kru isisu i ure ku Musa ku kakami. <sup>6</sup> Ni ikuchi yi, Ingga gru kri ngbangba di ingga ta na inkindirr yi nggo iwre ku Abachi, ni ki abiga Yesu ba iha ndanda

mi. Ingga kri ngbangba nā ta si nggo unushirr ka kru isisu i are munta ka. Ingga kru isisu imbarry yi namri.

<sup>7</sup> Aseki ka nggo ingga di na ka ni ikuchi yi, ni kye da Abachi ta di ingga na wre, ziza ingga kye ka a sa ki ingga nu undu, ima yo du ingga i ka ka wre ki ingga bu ga Kristi. <sup>8</sup> Aseki kama nggo ingga di na ka di ingga ta su ku Abachi isisurr, ingga kye ka ziza a si ka gigye, nggo ingga ti tsarr ka kye ni hi da inkindirr yi nggo mri inggi si nggo ingga hi Yesu Kristi Atiko mungga. Nggo ni itu ima yi, ingga kā aseki ka namri, wre ki ingga bu su ku isisurr. Ziza, ingga kye aseki akama si ki ingga izi iki, wre ki ingga bu kri ngbangba ni ga Kristi, <sup>9</sup> ni bu ga ma ni isisurr mungga yi pempe. Ni ikuchi yi, ingga di na aseki akama namri nggo Are munta ka a da, ima i si si du Abachi kye ingga ki uni na wre hen. Inkindirr yi nggo i wre ki ingga su ina wre yi nggo Kristi nga ni ttu na kpa ingga ttungo ni ila ure mungga yi, nu nggo ingga yo isisurr na ku. <sup>10</sup> Ingga zha di ingga ta hi Kristi kakami, ni hi ukyekye ku nggo Abachi à ta ma si ni ibe. Ni zha di ingga ta ga ma ni ki iha ndo na ku, nā ta si nggo à ki iha ni itu mungga. Ni bu ttu nā ta si nggo à nga ni ttu. <sup>11</sup> Ingga zha di i bu si meme yo di Abachi bu ta ingga si di ingga ka ni so tsitsirr.

### *Ikri ngbangba ni kru ko ni ikikre yi*

<sup>12</sup> Ingga nise kpa inkindirr inggi yi nggo Abachi à yo ingga na yi. Ingga ni se na ki pempe. Ima yo di ingga so ta ukpa wre ki ingga bu kpa aseki angga ka nggo Yesu Kristi a yo ingga na ka. <sup>13</sup> Amuya yi, ingga si ba itu mungga di ingga na aseki angga ka

namri hen. Inkindirr iyirr ingga ta na, ingga si ta ri amarr ku aseki ka nggo à ka vu sarr nu ugo hen. Ingga ko ta ukpa ni inkindirr yi nggo i se ni ichi mungga. <sup>14</sup> Ingga ni ko ta ukpa kyekiye mi ta ko ku kpa azadi ka nggo Abachi yo ingga na ka nu unkplassu, nggo na di ingga ga Kristi Yesu.

<sup>15</sup> Inta angga ba nggo kri ngbangba ni izhi yi, amarr mutta ka bu sa ayirr ni itu aseki angga ka nggo ingga ko re ni itu yi. Imba ta si ta kpanye na aseki numa ka hen, Abachi ta tsarr imba amarr ka nggo ingga so di re ki imba ni itu yi, a ka yo si ka wre ka. <sup>16</sup> A ti sa anggi mi, inta bu vu inkindirr yi nggo inta i ka hi yi ba gri ngbangba.

<sup>17</sup> Amuya mungga bu iga, imba nggurr atu bi ni ga uzirr mungga uzizi ku nà ta sa abiga. Imba bu ga uzirr ku abangga ba nggo a di zirr wre, nà ta si nggo imba hi inta di zirr wre, nggo inta di so ni imba ba. <sup>18</sup> Nà ta si nggo ingga ka da ki imba ankpa shishemi, ziza nggo ingga ko da ki imba na ashishi zizo. Anishirr shishemi a karr Yesu Kristi, nggo a si du anishirr bi wo ure ku nggo Kristi a ni ttu nu unkunkurr ku hen. <sup>19</sup> Unto ku iso ambarr ku i su nu uru, nggo a kye aseki ka ingbingbru ka yo su ba azhi ambarr wa. A so nggurr anke na aseki ka nggo a sa ki ishisha. Amarr ambarr ka se na aseki ka ingbingbru ka yo mre. <sup>20</sup> Inta angga ba, unto ki iso mutta ku se nu unkplassu. Inta ko surr ashishi na anko a uni kpa inta ttungo wa, nggo à ta ji zhi nu unkplassu, nggo uwa yo sa Atiko mutta wa Yesu Kristi. <sup>21</sup> Nggo Yesu taka kanga, à ta ni ka ukpa mutta ku ingbingbru ku sarr. Inta taka se nu ukpa hehe nggo su ukyekye nà ta si umaku. Nggo à taka ni ka inta sarr, na taka na undu kuma nu ukyekye

ku ittu umaku na atu aseki ka namri.

## 4

<sup>1</sup> Amuya, ingga kpanye ni imba ba kakami, ni zha di ingga ka hi imba. Imba yo ni ingga inyarr ni si azadi ka undu mungga ka. Nâ ta si nggo ingga di da ki imba, imba bu kri ngbangba ni iyo isisurr imba yi, ni ga Atiko yi meme.

### *Bulu nggurr abiga ba nu Filipiya*

<sup>2</sup> Ingga ko tsi ki imba ango, Yuwodiya tuku Sintike, imba bu kpanye ni ikpa ni bu hi di imba sa anishirr ba Atiko. <sup>3</sup> Ukpamu ujiji, nggo ko na undu ku ni ingga ku, ingga ko barr uwa, zi amba angga ba du ba kpanye ni ikpa. A na undu ku kakami ni ingga ku ni bre ku anishirr Ure ku wre ku ni itu Yesu Kristi. Amba angga ba kri ngbangba nu Klementi ku ndo ni inkpu anishirr abanu nggo a so di na undu ku ni ingga ku. Abachi à ka charr asa ambarr wa nu ungbamvu ku abi so tsitsirr.

<sup>4</sup> Imba bu so di nyarr ttuttumi nggo imba sa anishirr ba Atiko. Ingga da zizo, imba bu nyarr yi! <sup>5</sup> Imba na ché ni ikpambirr ku. Meme nggo anishirr abiga abanu ba ta hi di imba su ché. Imba bu hi di inga i Atiko yi i ki ywhiywhirr ba. <sup>6</sup> Imba si vri ni inkindirr numa hen. A ti sa anggi mi imba so zha, imba bu barr Abachi, ni di barr ma ni inyarr ni isisurr. <sup>7</sup> Meme nggo, Abachi à ta ni imba isu isisurr inggi yi nggo i mri ikye hi i unushirr. Isu isisurr ima i ta lo amarr amba ka ni isisurr imba yi gri ni Kristi Yesu ku.

<sup>8</sup> Amuya, ziza, uwanggo yo su aseki ka nggo imba bu ri amarr ambarr ka ni isisurr imba yi. Imba bu ri amarr ka aseki ka nggo a sa ajiji, nggo

imba hi yi di a ta du anishirr kye imba ssu na ungo. Amuya, imba ri amarr ka aseki ka nggo Abachi à da di a si ka wre na sa ni ilà, na aseki ka nggo anishirr ta kpanye na ka hanhan mi, na ta ni imba asa zizi. Imba kri ngbangba na aseki angga ka nggo sa ka iwre anishirr di bre are zizi na ka. <sup>9</sup> Imba na aseki angga ka nggo ingga i tsarr imba, imba kpa ka. Ni na aseki ka nggo imba i wo ka ni ingga ku, na angga ka nggo imba i hi ingga ni na ka. Abachi nggo di ni isisurr ta so ni imba ba.

### *Bulu nyarr ku Anu Filipiya ba ku aseki ka nggo a ni*

<sup>10</sup> Ingga so di mè nyarr ku Atiko kakami na aseki ka nggo imba shirr ni tu ba na ka ga ki ingga. Ima mi tsarr ingga di imba so di ri amarr mungga, ni se ni isisurr izi ingga. Ingga hi imba so di ri amarr mungga jiji. Anko wa mu sama nggo imba ka tsarr ingga di imba so ri amarr mungga ka. <sup>11</sup> Ingga si ko da meme di ingga so zha inkindirr mu hen. Ingga ka hi ba, ni di vu isisurr ka na anko a ta wa. <sup>12</sup> Ingga hi nggo a di da du unushirr sama ni inkindirr, ka à se na yi. Ingga ka hi utirr ki ivu isisurr ni itu i aseki ka wemi ba, ka ingga ti shi, ka nu nggo ingga ti so ni iyo, ka ingga ti se na yi shishemi, ka ingga sama na yi kpukpurr. <sup>13</sup> Kristi nggo ni ingga ukyekye ku na meme ku.

<sup>14</sup> Ingga nyarr ki imba kakami nggo imba zi ingga ni ivi inggi yi nggo i tsì ki ingga kakami. <sup>15</sup> Imba, abiga ba nu Filipiya, imba mi hi nâ ta si nggo ingga hi di ni ivi imemè yi nggo imba i kpa Ure ku wre ku ni itu i Yesu Kristi, nggo ingga bre ki imba, ni ivi yi nggo ingga huzzu na anga ka

Makidoniya ka. Imba yo sa abiga abi imemē ba nggo imba zi ingga na azo, abanu si na meme zizo hen. <sup>16</sup> Tuku nggo ingga ni so nu Tesalonika, imba i di tu ba na azo ttuttumi gri ki ingga nggo ingga ko zha izi. <sup>17</sup> Ingga i si ko bre ki imba meme di imba bu gri ki ingga aseki numa mu zizo hen. Ingga i ko da meme di Abachi bu yo ki imba angu ka iwre ku izi yi nggo imba i so di zi ingga. <sup>18</sup> Zizami, ingga ko da ki imba di ingga i ka kpa aseki ka nggo imba i tu Ipfafroditu gri ki ingga ba. Abama yo a si aseki ka nggo ingga i sama na ka, zhi na azhibarr wa nggo Ipfafroditu a gri iki inggi yi ga ki ingga, ingga i si ko zha inkindirr numa zizo hen. I si nā ta si iki yi nggo a tu yi nu uru na du intsi i hun ingba wre yi i hun ko na Abachi ku, uwa nyarr yi na kpa yi. <sup>19</sup> Abachi wa nggo ingga so ga ma à ta ni imba aseki ka nggo imba i so di zha ka namri. Na ta ni imba na ka shishemi nu ungo ku Kristi Yesu.

<sup>20</sup> Inkpinkpye ni inyarr i ta si i Abachi amunta nggo a si Aki, ase na ase! Du yi si meme yo.

### *Ichi i ikikre*

<sup>21</sup> Chi ki ingga anishirr abiga Abachi ba namri nabo. Amuya aniru na amba abangga ba nggo a kpa Kristi Yesu, na so zi ingga undu ku ni inggya a so chi imba. <sup>22</sup> Anishirr abiga Abachi ba ni inggya mi a so chi imba namri. Abiga ba nggo a so ni iko i Kayisa, aba mi a ko chi imba.

<sup>23</sup> Ingga i ko barr di Atiko amunta wa Yesu Kristi a bu na wre ki imba na bu kpanye ni imba ba.

## **Ungbamvu Ku Abachi Azhi Ahehe Ka New Testament in Ninzo (NI:nin:Ninzo)**

copyright © 2011 Wycliffe Bible Translators, Inc.

Language: Ninzo

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789156047

### **The New Testament**

in Ninzo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
d46fed5f-6317-5355-ab77-aef8925db2e6